

Olà éla l'atenzion de Trent per la mendranzes?

La UAL e l'Conseier Luigi Chiocchetti valutea de se tor fora da la maoranza: "Dò la litazions no sion più stac touc en conscidrazion. A che joel donca fèr pèrt de la coalizion de goern?"



La pruma Comiscion aea prejentà la lege te Fascia acà n an.

"L'é tempes senestres per la mendranzes, a Roma desche chiò da nos. A Roma defat no i enten e i chier de neèr jù coi fac l valor e l segnificat de l'autonomia, e a Trent zachei no enten l valor e l segnificat de la mendranzes linguistiches, fèran l'atuazion de na lege emportanta che era passèda acà nience n an tel Consei provinzièl a gran maoranza." Chesta conscidrazion era stata fata dal president Lorenzo Dellai te la última Conferenza de la mendranzes, stata a Poza ai prumes del meis de mèrz passà. L'aea dassen rejon, anzi someassa che l "virus"

de la pecia atenzion de Trent ti confronc de la mendranzes se abie slarià fora desche na moria.

Na lingia de segnes de pecia conscidrazion e de domanes restèdes zenza risposta da pèrt de Trent e de sic goern e goernador vegn lamenté te Fascia, anter chisc bele per fèr vèlch ejempie l fat che Detomas no é più stat confermà te la Comiscion di 12, o l fat che da n trat se rejone de mudèr l dirigent del Servije Mendranzes de la Provinzia zenza nience na parola co la mendranzes enstesses.

Na comunanza che à sostegnù

con forza Dellai e la coalizion che ades é al goern, apontin percheche i se aea semper dit e desmostrà ascorc e vejins a la mendranzes, se aessa spetà dò i 9 de november na conscidrazion e n tratament desferenc.

La "gocia", ma se trata ben de na bona gran pegnata, che à fat jir per sora la candola del malcontent te Fascia per la mencióna de conscidrazion che ge vegn rerservà a Trent, l'é stat la prejentazion de 3 proponetes de mudazion de la lege su la mendranzes, portèdes dant dal Popolo delle Libertà, da la Lega e dal Partit Democratic.

La costion é stata l'argoment de maor emportanza ence te la pruma scontrèda del nef direttif de l'Union Autonomista Ladina, chiamà ite en mèrcol passà a Poza. Chesta lege, voluda con forza dal goern provinzièl, lurèda fora e condividuda dai raprejentanc de la mendranzes ladina, mòchena e cimbra de la provinzia de Trent, e uzèda fora dal president Dellai e da tropes etres desche n ejempie de gran valuta per la defendura e stravardament de la mendranzes, vegn metuda en discusion pec meis d'ò sia aproazion, dant amò

de vegnir metuda en doura. E soraldut la proponetes de mudament vegn portèdes dant zenza chierir nience n moment de confront con i raprejentanc de la mendranzes, e chest no demò da pèrt de partit de la mendranza, ma ence dal Partit Democratic, maor partit de goern e component de la coalizion che tol ite ence l'Union Autonomista Ladina.

Ncomportament e na mencióna de atenzion ti confronc de la mendranza e de lealtà ti confronc di partners politics che l direttif de la UAL à condanà con forza e conscidrà no azetabol.

"Dò la litazions no sion più stac touc en conscidrazion. A che joel donca fèr pèrt de la coalizion de goern?" chesta la conscidrazion del direttif de la UAL, che é dò a valutèr l'idea de se tor fora da la coalizion e no sostegnir più la maoranza. "Se resta chest l livel de atenzion e conscidrazion che l goern provinzièl moscia concretament per i ladins, endèna che duc se empienesca la bocia con de bela paroles su l'emportanza de la mendranzes – l'é stat dit – la UAL e so raprejentant Luigi Chiocchetti jirà fora da la coalizion

de goern de la provinzia e la lascerà la encèries te la Region."

Chel che à soscedà l maor permèl l'é soraldut l "metodo" e l comportament di partners de la coalizion, olache ence l medemo president Dellai dò i 9 de november somea se aer desmentì de la mendranzes. A livel politich donca la UAL à dezidù che jir jù sech. Tel merit enveze l direttif à lascià mingol più lèrga a posizions no pregiudiziables. "Pel ence esser – à dit Luigi Chiocchetti – che vèlch pont de la lege posse vegnir metù en discusion, nesciuna lege é perfeta, ma ge vel che chest vegne fat jan dò al medemo percors che aea portà a sia aproazion, travers na discusion fona che tole ite la comunanzes de mendranza."

Endèna la Pruma Comiscion legislativa à chiamà ite i raprejentanc de la aministrazions e de l'Istitut e l'Union di Ladins per en mèrtesc ai 19 de mé a la audizion perveduda da l'organism istituzionèl che laora fora la proponetes per l Consei Provinzièl, per sentir sia opinion en cont di mudament porté dant dai 3 partit trentins.

Lucia Gross